

transmissum fuisse. Hic exitus fabulæ ficti Sebastiani fuit, 1602
minime miranda res, cum vetera sæcula repetentibus, eadem sæpius contigisse inveniuntur. Andriscus quidam, ultimæ fortis homo, Persei Regis se filium ferens, & mutato nomine Philippus vocatus, cum ab urbe Roma, quo illum Demetrius Syriæ Rex ob hoc ipsum mendacium miserat, clam profugisset, multis ad falsam ejus fabulam coeuntibus, contracto exercitu, totam Macedoniam, aut voluntate incolentium, aut armis occupavit. Non defuere qui Alexandrum, qui Neronem ementirentur; compluresque apud græcos latinisque historiæ scriptores comperies, qui veros principes tam ambiguo descrimine sunt imitati, ut ingentes motus turbasque variis in regionibus excitarent. Sed quod mirere, non tantum spectrum hoc Sebastiani plebejos gregariosque sui mendacii adstipulatores, verum eruditos quoque assertores habuit, qui, scriptis, non uno idiomate editis, insigne hoc commentum astruxere; atque inter ceteros Sampajus Lusitanus argumentis non modo, verum etiam vaticiniis confirmare est adnixus. Sed ad institutum regredior.

Reliquis Europæ regionibus quiescentibus, mars in Batavis tantum atque in Pannonia sæviebat. Albertus Ostendæ premebat acri obsidione, cum interim Mauritius Nassovius, Batavorum imperator, Graviæ oppidum ad Mosam amnem oppugnat ac deditio potitur; alternisque modo prosperis modo adversis eventibus dimicatur. Eodem tempore in Pannonia pari fortuna res geritur. Mercurii Dux, dum in Galliam proficiscitur, Norimbergæ excessit. Buda a Cæsareanis intercepta, castrum præsidiorum constantia ac pertinacia defensum, conceptam in illorum animis spem elusit, reque infecta abscedere coegit. Qui, ne liber vagandi aditus Turcis esset, Pestum, e Budæ regione situm oppidum, valido militum præsidio communiunt, irrumpentesque sæpius invadunt ac cædunt. Parte alia Sigismundus Battoreus, victus antea ac profligatus, irrequieto spiritu rursus a Cæsare deficiens, Daciam occupat. In eum Georgius Bastius, Cæsareanorum summus præfectus, mittitur, qui Principem regionis civitatem, Bistricam, obsessam con-

*Mercurii
Ducis obitus.*

*Sigismundus
Battoreus a
Cæsare defecit.*

*Georgius
Bastius, Cæsareanarum
copiarum
imperator,
Bistricam
occupat.*